

味道腴齋文稿  
傅嶽榮著

序

余與味腴交三十餘年矣。尊甫晉甫先生習申韓學，由幕而官，江南名幕，自督撫逮州縣，往往爲先生弟子。江南人士識與不識，皆尊禮先生。余爲童子，謁先生於金陵，一見待以國士。及余自海外歸，復謁先生於北京，待余益厚。一日不見，念之綦切。未幾先生下世，其中子味腴獨衣食京師，念先生相待之厚，愴然憐味腴之孤露。每休沐，必過其廬，風雨聯牀，抵掌縱橫，論天下事。余行役蜀中，味腴復相從。故余與味腴相知獨深，知其有經世志，不欲徒爲文人。也。其後味腴落落無所合，則學古文法於余。中表桐城葉君浦蓀、葉君馬通伯先生高第弟子也。自方姚論文貴義法而古文有

桐城派之說以爲舉天下之文章無逾桐城上虞羅振玉先生見  
味腴所作節孝褒獎錄而深美之以爲是得桐城家法者也友人  
勸印其文稿味腴謙讓未遑畏赧不肯出曰吾文聊自嬉非有意  
於作者之林也余以爲味腴之文其有合於桐城派之軌轍否邪  
余不能知然其文則果言之有物也今夫易卜筮之書也聖人讀  
之而知其有憂患離騷辭賦之祖也而太史公以爲辭微志絜稱  
物小而其指大故曰讀其書知其言知其言則知其所以爲意矣  
讀味腴之文者必有能知其不欲徒爲文人之意者也是爲序

中華民國二十八年仲秋上浣洪鑄謹叙

味道腴齋文稿

目錄

褒獎節孝錄序

鄭孝胥先生行狀

日本乃木大將傳

長兄錢頌如先生家傳

于節婦傳

邱節婦傳

烈婦劉游氏傳

郭孝子傳

味道腴齋文稿

MG  
K812  
16



3 1760 0957 3

808993

味道腴齋文稿

吳孝女傳

榮祿公手書世系册跋

褒獎節孝錄序

出長城以北其間山川鬱秀崗巒起復地高而壤厚遼河松花江  
灌溉千里蜿蜒而達於海其靈淑之氣委積於天地之間則必有  
孝弟忠信秉節守道不幸苟生不避義死罹洊閔酷茹苦含辛以  
行其志者嗚呼自生民以來地維之所以立天柱之所以尊而名  
教綱常彌綸於天地之間終古而不敝者豈不以此也歟世衰倫  
薄君臣之義廢非孝之說興而天理幾於泯絕自由戀愛之說行  
而夫婦之道苦夫孝者天之經也地之義也古者風俗敦厚人人  
知忠於其君孝於其親如菽粟水火之不可須臾去也視其當然  
遂亦不甚驚異泊乎衰世能無忝其生者已不可多覩而能以孝

弟忠信自修者則譏者歎爲僅見矣然而毀傷肢體聖人曷爲而不與者何也曰此其所以教孝也夫身體髮膚受之父母不敢毀傷割股非孝之正也嗚呼忠孝節義而與於歎賞褒揚之例者正憂世道人心如江河之日下也昔孔子刪詩而以柏舟首鄘風之篇者何也曰以其一與之齊死而靡它也是以自古迄今女子皆知節行之爲美而賢者又復詠歌嗟歎之自乾隆十五年江蘇巡撫奏以年及三十而守節者不與旌表遂著爲令桐城姚姬傳先生嘗論女子夫亡守志有年未三十而其守尙易年逾三十而其守倍難者抑或夫亡無後及有後而衰困稚弱其懿美不彰者余以爲賢女秉節守義此皆發於至性而不可抑奪旌不旌何與也

自古求忠臣於孝子之門而賢母良妻皆永霜其志者是知忠孝節義其道固同揆也雖然奉國家之法以闡揚潛德幽光期以教民成俗者有司之責也是以爲政者思教化之成而民知德義必首重褒揚之例凡能孝於其親有柏舟之志者咸予褒旌而父母在無子不以身屬人如北宮嬰兒之孝於其親及能執干戈以衛社稷皆與於闡揚之例三省地靈毓秀必有忠孝之士女著爲瑰偉之行皆將秉筆以彰其節嗚呼名節綱常彌綸於天地之間終古而不敝者豈不以此也歟

味道  
膜齋  
文稿

鄭孝胥先生行狀

先生姓鄭氏諱孝胥字蘇戡福建閩侯縣人父守廉咸豐壬子翰林院庶吉士吏部考功司主事以狷介稱於時母林太夫人夢白鶴翔於庭覺而生公四歲叔祖虞臣授以爾雅遂成誦十三歲背十三經如流出語驚其長老舉壬午鄉試第一光緒十五年以經濟考取內閣中書改同知分發江南寓南京盩山盩山者梅伯言管巽之所爲餘霞閣記地也所與遊皆當世名宿詩文日益有名十七年黎庶昌使日辟先生爲書記官尋調神戶大阪總領事居三年益識其國之賢俊時日本明治維新國勢炎炎先生日求其富強之術及變法次第思歸效於時也甲午中日戰起歸國



朝論多主戰先生審外情度國勢獨知其不可張文襄督兩江以  
兵事詢先生辭意慷慨述勝敗之由文襄偉之遂佐其幕文襄議  
聯俄自爲疏稿示幕僚皆稱善先生獨否文襄意慍先生不屈爲  
剖陳利害議竟寢德宗親政以同知應召入都奏陳練兵之策稱  
旨賜特用道充總理各國事務衙門章京蓋異數也當是時帝銳  
意新政康有爲梁啓超議變法居頃之難作孝欽復垂簾先生遂  
去居外十三年未嘗入都焉二十五年檄辦京漢鐵路二十九年  
任江南製造局總辦會廣西匪亂蠡起提督蘇元春被劾遣戍朝  
議飭邊防以先生知兵遂以四品京堂督辦廣西邊務先生率武  
建軍二千餘人往武建軍者湖北新軍也自廣州泝河西行匪聞

大軍來皆竄匿至陀盧司聞伏匪阻山峽師行已越更還擊之匪  
殲焉未幾陸榮廷歸撫餘匪懼服聲威震兩粵間邊患悉平龍州  
接壤越南法人貿易每與華民齟齬先生威惠流行一秉以公遂  
無爭迕於是練兵興學沿邊二千餘里民始知學乙巳奏請裁撤  
邊防督辦解官北歸法人以雙龍寶星贈焉陽湖孟昭常著廣西  
邊事旁記述先生政績也三十三年授安徽按察使旋調廣東皆  
辭不赴築廬於滬曰海藏樓日與諸名宿詩文唱和詩出人爭誦  
之初先生值重九必置酒高會作重九詩在龍州人稱鄭龍州及  
是人又稱鄭重九也宣統元年東三省總督錫良擬築錦瓊鐵路  
及壺蘆島港延先生主其事赴奉與英荷成草約然竟爲樞廷閣

置宣統三年授湖南布政使就任十日復奉召入京議官制時革  
命之說風靡全國屢仆屢起先生以實行立憲足以彌亂之說進  
不省頌之武昌變起急馳回任至上海長沙陷道梗遂止於滬遜  
位詔下乃隱居海藏樓先生偕經憂患詩益工書名重海內外遂  
粥書自給詩文簡札但記甲子天下知與不知皆稱先生爲鄭海  
藏也袁世凱段祺瑞數以閣員徵皆拒不就癸亥奉召入覲命爲  
總管內務府大臣時經費久不給府中役使猶千餘人財匱則貨  
質以給先生改革積弊施罷不俟日居頃之吳張構兵馮玉祥自  
熱河舉兵入京先生知難將作與陳寶琛羅振玉及英人莊士敦  
謀解未及行變作上出居醇邸軍警圍守意不可測先生與陳等

謀避地一日揚言往東城相宅既出迺侍上幸東交民巷德國醫院至則遣莊士敦往英荷使館自馳赴日本使館求衛上英荷議未決而日使請自定行止先生念事急安危不容髮遂自驂乘趨迎上問道赴日使館上見途中警察驚詢曰何又出使館界邪先生從容對曰願安聖慮誰知馬車中有皇帝在者時大風揚塵晝冥途中沙石逢迎數武外不相見乃逕入日使館者先生力也乙丑上出居天津先生僦一宅囂塵近市朝夕詣行在侍講七年寒暑不輟啟沃甚至時扈從諸臣月有餽廩歲時復頒賜錢物先生獨不忍拜受辛未九月滿洲事起中外危疑上所居一日數驚十月先生與子垂侍上微服幸旅順滿洲建國命爲國務總理先生

以日滿兄弟之國也安則兩利而俱存爭則俱敗惟王道尙忠恕  
久要不渝足以協和民族擴而充之可兼濟天下也今世界競於  
兵皆陵人利己故言和平而反致戰爭嘗著弭兵說曰人道不明  
各營其私利已損人以強陵弱以衆暴寡此兵禍所以日亟人類  
所以日殘也於是王道拊循其民尊孔貴老勸孝褒節暮年日  
滿大和民用康樂康德元年御極禮成賜勳一位景雲章三月東  
渡修聘二年乘輿訪日特命監國五月遂疏乞骸骨賜前官禮遇  
築柳下廬於新京郭外屋僅四楹灌畦蒔蔬吟嘯其中意泊如也  
康德五年三月二十八日疾革賜大勳位蘭花大綬章是日薨於  
邸年七十有九上震悼輟朝朝野相弔悲失師保七月三日賜國

葬於奉天郊外富仁村先生豐神雋秀疏鬚髯頎身鶴立步履矯捷至老不衰與人恂恂而論議精闢雄毅之氣儼然不可侮詩文操筆立成剛勁稱其意旨平生未嘗臧否人物有誹之者無怨疾意人有匱乏周之如不及所入俸輒濟友朋仁三族自辛亥後中夜卽起作前後夜起庵賦因自號夜起庵叟嗚呼先生之志蓋圖回天下於掌上俾生民免於疾威端然正己以道牖民滿洲之於王道蓋魯秉周禮之意也使竟其意志則艾安者豈徒東亞民族舉天下之民皆安矣著有王道講義集暨海藏樓詩十三卷行於世配吳夫人先十年卒三子垂禹何垂忠孝出天性民國屢徵不出隨先生侍上久艱苦不避上待之如家人父子滿洲肇建多所

擘畫先五年卒禹何皆能善繼先生之志云謹具先生出處行己之大節治國聞者庶幾知先生之志云謹狀

日本乃木大將傳

乃木希典日本山口縣人也先世以武功爲名將家父十郎爲毛利藩王府醫官典廐事以忠貞任侍衛輔教世子希典生弱父督之嚴嘗曰兒將種也毋忘鞍馬及入學見人躡雨屐羨之歸謀諸母母曰兒第勤讀他日自得履會大雪索屐不得跣行雪中父施從之未數武仆父怒自頂至踵沃以水誨之曰武士子當立功疆場乃與人競一屐邪年十一從結城江見學漢學十四讀兵書習騎射十五入藩部敬業館淵默愛文學時萩城有明倫館大村益次郎爲之師藩府士爭趨之乃請於父願從太村遊不許令仍習武其從父曰玉本文之進名士也講學萩城旣不得請則往從其

叔學叔不許誨之如父叔母憐焉爲請得留令習爲農圃耕耨筋骨益堅比歸省父大喜許入明倫館是時幕府勢不振尊皇之風徧全國尋幕府起兵攻長州急乃本年十七爲藩府山砲車長與幕府兵戰傷股而敵殲焉事平復入明倫館明治二年爲報國隊漢文教授三年入大村益次郎伏見親兵營習法蘭西式軍隊教練尋任藩部陸軍教官明治四年擢少佐八年任熊本鎮台署步兵第十四聯隊長與平前一誠之亂旣西鄉隆盛叛率兵討之及戰喪其軍旗欲自殺其佐止之奮與敵戰傷足益厲輿筐督戰亂平功最擢中佐十二年晉大佐十六年升少將任十一旅團長十九年赴歐二十一年返國任第五旅團長二十五年休職二十

七年中日戰起復任旅團長轉戰金州旅順太平山營口田庄台  
皆有功和事成以功晉中將第三師團長封男爵任台灣總督於  
時俄羅斯蠶食中國築南北滿鐵道租借大連旅順擴海軍脅威  
朝鮮陵轢日本明治三十七年春日俄遂戰乃木任近衛留守師  
團長拱衛京畿尋第三軍出征以乃木任司令五月發自東京至  
廣島聞長子勝典少尉戰死六月六日由關東州鹽大澳登陸七  
日次金州至勝典墓時夕陽在山萬籟俱寂徘徊不忍去爲詩曰  
山川草木轉荒涼十里風腥新戰場征馬不前人不語金州城外  
立斜陽當是時俄以勁兵數十萬星布於大連旅順遼陽沙河奉  
天間而旅順天險有金城湯池之固砲壘縱橫碁峙當之輒糜力

攻數十日旅進旅退卒莫能克次子保典復戰死全軍哀之謀以禮葬乃木聞之叱曰今戰而死者獨非吾弟吾子乎何獨厚保典也令與士卒同火葬三軍雨泣爭效死大小數十戰比有功旣聞俄波羅底海艦隊且東來旅順不急下則勝負未可知於是裒軍選死士臨難蹈危僵仆不稍退爭赴敵死壘屍累骸塞道而進乘機應會遂獲爾靈山高地山旣得則據高之勢成旅順如井底矣俄帥斯泰塞爾力竭乞降許之旣受俘元帥大山巖命率師攻奉天與俄軍三十萬人大戰於南滿原野克之於是威名震天下而俄與日平世所傳樸資茅斯條約是也其戰視士卒如家人子寒待人先衣而飢俟人食後方戰之殷憫士卒勞苦日臥地上元戎

念其老賜以夔裘則拜受與傷兵也由是士卒感發攻敵無堅凱  
旋痛死念傷無以慰父老至欲微服潛歸故里故其詩曰愧我何  
顏見父老凱歌能得幾人還論功晉伯爵功一級授金鷄暨旭日  
大綬章翌年親任爲學習院長教育貴族子弟屏居院中謹身率  
先人皆從化明治四十四年英帝加冕與東鄉大將隨依仁親王  
赴英世人皆願瞻兩將軍丰采四十五年七月天皇不豫日晉宮  
省疾歸則祈天永命願以身代七月三十日天皇崩九月十二日  
奉安桃山御陵禮砲鳴靈輿出遂與夫人靜子同時剝腹自殉舉  
國震驚哀慕若喪所親焉初旅順未克俄艦且東來國人交譎責  
讓之函日至軍有軍士踵門讓夫人曰乃木率日本子弟數十萬

攻旅順死傷日積未聞獲尺寸地辱國亡師誰之咎也若猶知恥當以死謝國人次亦宜避賢路何久淹我師爲此則夫人與有責焉夫人則偕侍婢至伊勢神宮時冬夜祁寒風聲謬謬明月在天齋沐祈於神前願殞身報國自酉迄辰不懈其爲人柔淑嘉明佐夫以禮二子出征勉以戰陳無勇爲辱洎戰歿遂無子然日人崇功報德乃木神社徧全國蒸嘗尸祝至今不衰

贊曰趙衰論將說禮樂而敦詩書余讀乃木大將之詩想見其爲人彼之爲教可謂御於家邦矣日本自明治維新數十年間一戰勝中國再戰勝俄遂雄長東亞其故可思也嗚呼國有斯人則城郭不待葺而固敵國不待誦而服矣詩曰樂只君子邦家之基乃

木有焉

味道腴齋文稿

味道腴齋文集

長兄錢頌如先生家傳

先生諱定爾字頌如姓錢氏先君長子也先君卒桐城馬通伯先生爲墓表具官世行治先生事親孝謹無子弟過先妣楊太夫人晚歲遺痺痿疾苦痛則撲人先生委婉將順聽侍勤劬少間則昇椅遊園中年餘益謹長嫂杭恭人亦觀感爲刲股奉姑焉先生白皙美丰姿與人和易雖臧獲溫然即之子弟有過煦煦述事理使感悟而後已壬子先君卒家漸落先生顧諸弟弱慮無以教養則深自刻厲與定鈞同讀律於兩江法政大學風雨寒暑命弟車行已獨徒步也其後任臨淮權運局長有吏能賈人有以賄運私鹺者徧賂他局皆諾先生獨持不可卒寢其事癸丑臨淮豪民起事

驅殺官吏獨偉視先生請留然先生竟棄官歸豪禮而遣之曰錢君廉且長者也禮以得民及秣陵兵燹家資盡失先生挈家人如滬以所餘畀諸弟曰弟幼無以資生也則藜藿衣褐自厲益甚翌年官浙江大嵩場知事地濱海苦瘠蔬食不具朝夕冒寒煥以勞劬卒官彌留時家人里居無在側者時甲寅十月十七日也年四十一凡嘗與遊者皆稱先生孝友烝烝爲之悲憫太息以天道難知如先生者不克終撫其弟而竟其志也悲夫壬子之歲定鈞侍先君北平每中夜覺醒戶外一燈明滅須臾則先君來撫視也當是時先君思先生甚曰汝長兄孝友汝宜則之每念斯言未嘗不痛早失父兄也先生亡後十四年其子弼臣始有子曰毓梓日依

依余側撫愛之而益念先生也

味道腴齋文稿

二十七

味道腴齋文稿

于節婦傳

于節婦直隸某縣人。生而端凝。父張公富。故儒士。幼以詩禮教之。故其後艱危。死生。斃居凍餒。無一日儲。百折不撓。忍死成志者有由也。始節婦年十五。適奉天昌圖縣于珍。後遷遼源。著籍焉。時惟衰翁在堂。窶甚。日助夫操作。十七歲生女。數年有男三人。其季之生也。夫病歿。節婦營喪葬。羸困竭資。而衰翁痛子傷貧。遭罷癘。疾不能自起。居子女皆幼。斃斃。鰥獨恃節婦以生。操作晝夜。猶弗給。迺出而丐食。入將病。翁撫諸孤。艱苦貧辛。萃於一身矣。節婦方少艾。美容姿。夫中表某富冠一鄉。必欲得節婦。進以游詞。不從。使人威脅誘惑。百端節婦畏逼。則截髮毀容。斷一指。誓死以明志。節婦

有老母貧無依亦往從節婦日率長子丐食得敝衣殘炙先翁母而後哺兒日僅一餐或竟日不食風雪嚴寒儲其餘以待進獨與子女忍寒飢相偎倚取煖亡何兩幼子患痘危甚不食二日矣鄰媪憐而與之米始更生頃之翁歿無以殮中表某乘危蠱之賴鄰人助之葬難得免盛夏霖雨壞屋鄰人爲掘地室以居有牛陷其竇釜裂牀圯老母復故鄉人有行義者始克葬又有勸醮者曰人生須臾耳何自苦如此節婦曰吾不忍貧吾夫也長子年十一次子八歲爲人傭稍稍得食歲饑復困冬又祁寒無一絮蔽體面耳戰裂指甲墮落晨汲僮仆雪中女待母不歸號泣求得之已不能言胡先生贈絮衣飲以酒始蘇母子五人日共啖一薯迨諸子既

長能力傭女亦適人家乃稍裕積十餘年得二百金欲爲子娶婦以延宗祀中表某啗以甘言假其金竟不復歸故三子至今無室以幼時寒飢所困皆瘠而患嗽民國十七年某月節婦歿年七十一自言七十餘年酒肉不過數嘗絮衣不過數襲而已嗚呼自古忠孝服義之人當其洊罹屯困極人世至艱斷脰決腹一瞑而不視不知所益蓋其心有所不忍負也節婦以少艾之年秉操潔清苟稍移易其心志則溫飽隨至而必伏處圭竇出萬死以與命競堅貞之性天不能奪誰謂荼苦其甘如薺其節婦之謂乎。

味道映齋文稿

邱節婦傳

邱節婦李氏者奉天省法庫縣人也幼生農家未讀詩書而性嫻禮義適邱氏事翁姑以孝聞嫁後數年生子女四夫病痺痿諸所須必倚節婦翁性貪鄙念子久病減其產而復多子女累諷節婦再醮不可則逐而出之曰毋溷乃公也節婦奉夫携子女居村右矮屋中貧甚恒數日不得米掘苦菜爲食里中長者嘉其志而憐其貧也時或餽之米則共苦菜煮食之里有無賴涎其色欺其貧中夜叩戶欲犯之初以利誘不可立戶外不去節婦懼脅操刀立門內叱曰汝苟前者以頸血灑汝矣相持終夜卒不得逞於是里人益重視之先是翁既逐長子婦獨與次子夫婦居無何次子死

婦嫁遺孤無依節婦收恤之煦育如所生翁姑老病產盡耗貧不能自活往依節婦孝事如初養生送死盡禮無憾節婦之事其夫也保之如慈母之於嬰兒意有所欲力所能及必應之無懈色無怨言夫病二十餘年而歿節婦事之如一日也何有何無黽勉求之節婦有焉

烈婦劉游氏傳

劉游氏奉天營口縣游永林之次女同邑劉荷業之妻也其居在第七區羅家屯民國二十年十月十五日匪入村大掠婦女多遭蹂躪不敢稍觸匪怒獨游氏慨然與抗罵不絕口匪大怒竟槍殺之彈自前胸洞背出也嗚呼游氏者一農婦耳未嘗聞仁義詩書之訓也一旦臨大節必出於死爲義此固有國家者之所旌別也誦仁蹈義者其所出應何如哉

味道腴齋文稿

### 郭孝子傳

郭孝子名振邦吉林長春人也父永發生三子孝子其長也年二十三父卒哀毀骨立恐傷母意往往於無人處飲泣時二弟幼弱於是孝子上事寡母下撫諸弟融融如也母欲二子讀孝子則假貸以供之晨夕之養不以溷諸弟民國十九年母患風痺孝子親調藥食晝夜扶抑母卒親友有主以儉治喪者孝子泣曰吾父卒時振邦少葬事不備今殯吾母凡附棺附身必誠必敬期無憾而已既葬愛撫兩弟彌篤曰吾母已亡吾無以致其孝養愛弟所以孝父母也

味道  
腴齋  
文稿

三十八

榮祿公手書世系跋

童時聞三伯父榮祿公多遺著最篤倫紀來金陵先公事之唯謹爾時雖稚齒知敬狂伯英兄設肆蘇門折閱甚先公爲董理債家懼欲以賄沮先公曰果爾他日何面目見吾兄卒爲追所侵失丙辰丁巳間卓人建人兩姪來京師兩人者榮祿公之孫也同館梁家園余與建人同歲生尤相愛籌一燈讀每至夜分余時去津則卓人兄弟憮然不樂也後卓人居津有陵之者爲解紛有匱乏未嘗不資之也卓人遂以榮祿公壬辰年所錄本支世系冊遺余壬辰蓋余與建人所生歲也中有公側室某恭人所書字端秀公卒遂殉烈矣自卓人前卒建人去滬余益貧曩時之樂

不可復得矣世衰倫薄羣從兄弟往往如途人建人獨承先人篤厚之風與余相携如其兄茲可念也因此編歸之建人撫念曩昔其亦有慨於中乎

2042A